

percunti populo authores mortis
existimus, qui esse debemus Duces
ad vitam; ex nostro peccato populi
turba prostrata est, &c.



PARS SECUNDA

*De his, quæ Parochum
perficiunt in ordine ad se
ipsum.*

CAPUT I.

De

*Necessitate, quam habet Parochus
propriam Salutem curandi.*

Recupera proximum secundum
virtutem tuam, & attende
tibi, ne incidas. Eccli. 29. Re-
gula
B 2

gula ordinatæ Charitatis est , ut homo diligat proximum suum sicut seipsum. *Matth. 22.* Non supra seipsum : non enim ut alijs sit remissio , vobis autem tribulatio , sed ex æqualitate , inquit S. Paulus *2.Cor. 8.* Qui idcirco etiam Timotheum Episcopum hortatur , ut in officio suo primam sui ipsius curam gerat , deinde aliorum , dum ait : *Attende tibi , & doctrinæ , insta in illis ; hoc enim faciens & te ipsum salvum facies , & eos qui te audiunt.* *1. Timoth. 4.* Quod idem inculcat Presbyteris Ephesiniis *Act. 20.* dicens : *attende vobis , & universo gregi , in quo vos Spiritus S. posuit Episcopos , regere Ecclesiam D E I.* Nec ipse , licet tantus esset Apostolus , hanc salu-

salutis suæ curam neglexit, sicut
de seipso fatetur 1. Cor. 9. *Castigo*
corpus meum, & in servitutem re-
digo; ne fortè cum alijs prædicave-
rim ipse reprobus efficiar. Habet se
scilicet hic mundus(qui totus est
in maligno positus) velut quod-
dam Nosodochium hominibus
pestiferis refertum ; Unde si-
cuit Medicus talem locum subi-
turus necesse habet corpus suum
antidotis & medicaminibus à
veneno præservantibus solicite
præmunire, ne contactu vel ha-
litu infirmorum pariter inficia-
tur: ita Parochus, qui Spiritua-
lis animarum est Medicus , &
non solùm versari debet cum
hominibus contagiosâ pessimo-
rum morum lue infectis, sed &

malè fœtentes eorum conscientias perscrutari, necesse omnino habet cautelas & media cum magnâ solicitudine adhibere, animumque suum spiritualibus antidotis præmunire, ne eâdem vitiosorum hominum lue corripiatur & pereat: *Quid enim prodest homini, si Mundum universum lucretur, animæ vero suæ detrimentum patiatur? aut quam dabit homo commutationem pro anima suâ?* Matth. 16.

CAPUT II.

De Timore DEI.

Principium Sapientiae Timor Domini: & Scientia Sanctorum prudentia. Proverb. 9. Primum igitur

igitur, quod Parochum in ordine ad seipsum perficit, & in gratia DEI perseverare facit, est Timor Domini : *Qui enim timet DEUM, faciet bona. Eccl. 15.* Et per Timorem Domini declinat omnis à malo. *Proverb. 15.* Est autem Timor DEI duplex, *Filiialis* scilicet & *Servilis*. Prior non vult offendere DEUM, quia summum bonum est : Posterior, quia Vindex malorum. Per priorem homo justificatur, eò quod sit actus Charitatis. Posterior licet peccatorem non justificet, eum tamen ad justitiam & peccatorum detestationem adducit, ac propterea in S. Scriptura commendatur : *Qui enim sine Timore est, non poterit justificari:*

Eccli. 1. Eò quòd velut navis gubernaculo suo destituta , & à ventis temptationum agitata necessariò ad vitiorum scopulos allidi debeat. *Unde* passim legimus Sanctos hoc fræno Timoris DEI usos fuisse ad servandos se immaculatos in suis temptationibus , sicut de Tobia Seniore testatur Scriptura *cap. 2.* *v. 9.* de Juditha nobilissimâ viuda *Cap. 8.* *v. 8.* de Susannâ uxore Joachim. *Daniel. 13.* *v. 23.* De obstetricibus Ægyptijs *Exodi. 1.* *v. 17.* Et de se ac socijs suis , fassus est P. Antonius Araozius : hic enim cum à Rege Lusitano Joanne III. interrogaretur , quodnam herbæ genus usurparent Patres Societatis verfan-

santes in medijs hominum cætibus contra appetitus carnales, respondit, *herba quam socij nostri Castitatis custodienda ergo circumferunt*, Timor Domini est, illa miraculum istud operatur, ut Dæmones à se longè repellat & effuget, sicut olim piscis Tobiae prunis superpositus. Timor Domini juxta Sanctum Gregorium lib. 6. moral. cap. 21. est Anchora cordis, juxta Hieronymum in epist. ad Fabiol. Custos virtutum. Juxta Tertulian lib. de cult. fæm. Fundamentum virtutis, quod uno sublato ruit tota perfectionis & justitiæ structura, attestante Ecclesiastico. Cap. 21. Si non in timore Domini tenueris te instanter, cito subvertetur domus tua.

B 5

Et

Et S. Bernardo Serm. 4. ad Sororem: *ubi Timor non est, ibi perditio est animæ: ubi Timor non est, ibi dissolutio vitæ est, ubi Timor non est, ibi est abundantia peccatorum.*

Oritur autem Timor Domini in nobis *Primò*, ex firma & viva fide in DEUM nobis intimè præsentem. *Secundo*, ex consideratione Supremæ & infinitæ Majestatis Divinæ de qua David Psal. 46. *Dominus excelsus terribilis, Rex magnus super omnem terram.* *Tertio*, ex consideratione Divinæ Justitiæ, quæ ipsis etiam angelis peccantibus non percit, sed rudentibus inferni detractos in tartarum tradidit crucian-

ciandos. 2. Petr. 2. de qua etiam loquitur Christus Matth. 10. Timete eum, qui potest & animam & corpus perdere in gehennam. Et Paulus Hebr. 10. Horrendum est incidere in manus DEI viventis.

CAPUT III.

De Humilitate.

Non alta sapientes, sed humilibus consentientes. Rom. 12. Quantoperè Parocho necessaria sit Humilitatis virtus, colligitur ex eo, quod superbis DEUS resistat, humilibus autem det gratiam Jacob. 4. Sine gratia autem DEI Parochus non possit resi-

stere temptationibus in Statu suo tam frequentibus , adeoque periculo se exponat turpissimi lapsus & publicae confusionis. Consuevit enim D E U S superbos revocare ad sui agnitionem per publicam infamiam , ut notant SS. Patres , dum eos labi sinit in manifestas turpitudines , ut sic confusi cum Psalmista dicant : *Priusquam humiliarer , ego deliquer : bonum mihi quia humiliasti me , ut discam justificationes tuas.* Psal. 118. Videre hoc fuit in Petro Apostolorum Principe , ut in memorato Rege Davide , quorum alter per trinam Magistri sui negationem , alter per turpissimum carnis lapsum ad suæ fragilitatis cognitionem fuit reductus.

ductus. Unde S. Augustinus lib. 14. de Civit. DEI cap. 13. audeo dicere, superbis esse utile cadere in aliquod apertum manifestumque peccatum, unde sibi displaceant, qui jam sibi placendo ceciderant.

Definitur autem Humilitas à S. Bernardo tract. de 12. grad. Humil. Virtus, qua quis verissimā sui cognitione sibi ipsi vilescit. à S. Thoma Viro. Virtus refrænans immoderatum excellentia appetitum, hominēmque subiiciens DEO propter ipsum, & proximo propter DEUM. Præcipui illius actus numerantut hi duo: Primus est agnitio propriæ vilitatis, fragilitatis & nihili tam naturalis

ralis quam moralis; quod in se agnovit Patriarcha Abraham Genes. 18. cum ait: *loquar ad Dominum meum, cum sim pulvis & cinis.* Et S. Paulus 2. Cor. 3. dicens: *non quod sufficientes simus cogitare aliquid à nobis quasi ex nobis, sed sufficientia nostra ex DEO est.* Alter actus ex primo sequitur, & consistit in hoc, quod quis vilem se ac fragilem ab omnibus haberi velit, nunquam de seipso aut de rebus suis honorifice loquatur, laudes hominum non desideret, nec in eis sibi complaceat, exterius viliora quæque pro conditione Statu sui eligat, in actionibus suis singularitatem vitet, proprij judicij tenacitatem fugiat, defectus suos sibi

sibi intimari libenter audiat , ac
denique omnia , quæ per ipsum
bona gesta sunt , DEO soli ad-
scribat.

CAPUT IV.

De Mortificatione.

Obsecro vos fratres per miseri-
cordiam DEI , ut exhibeatis
corpora vestra hostiam viventem ,
sanctam , DEO placentem . Rom . 12.
Describi potest Mortificatio ,
quod sit quædam repressio ni-
miæ vivacitatis hominis inferio-
ris & appetitus sensitivi . Distin-
guitur enim duplex in homine
appetitus , Rationalis scilicet &
Sensitivus . Prior vocatur homo

Su-

Superior, novus, interior, ratio, Spiritus, &c. Posterior verò dicitur homo inferior, vetus, exterior, animalis, sive sensualitas. Et quidem ante peccatum Primorum Parentum in homine sensualitas perfectè subdebatur rationi, sicuti ratio, obediebat DEO: at posteaquam Status Innocentiæ amissus fuit, sensualitas cœpit esse rebellis Spiritui sive rectæ rationi; propter quod etiam frequens est inter appetitum rationalem & sensitivum pugna atque dissensio: *Caro enim concupiscit adversus Spiritum, Spiritus autem adversus Carnem, sibique invicem adversantur Galat. 5.* dum Ratio tendit solùm in bonum honestum,

stum , caro autem fertur in ob-
leßamenta sensuum , nullâ ha-
bitâ ratione honestatis , sed so-
lùm boni utilis & jucundi. Un-
de qui carnis desideria sequitur ,
dicitur *Carnalis* , & secundùm car-
nem vivere , qui verò carnis ap-
petitus refrænat & coërcet , *Spi-
ritualis* est , & Spiritu ambulat , jux-
ta illud Rom. 8. Debitores sumus ,
non carni , ut secundùm carnem
vivamus : Si enim secundùm car-
nem vixeritis , moriemini , si au-
tem Spiritu facta carnis mortifica-
veritis , vivetis. & Galat. 5. Spi-
ritu ambulate , & desideria carnis
non perficietis. Qui sunt Christi ,
carnem suam Crucifixerunt cum
vitij & concupiscentijs.


Est

Est autem Mortificatio duplex : *Exterior* una , quæ sensus externos moderatur & cohibet , ne in illicita diffluant . Altera *interior* & perfectior , quæ sensus internos & potentias animæ refrænat , ne imaginationes , cogitatus vel affectus illicitos admittant . Solet enim Mortificatio coercere intellectum à curiositate , ut rebus inutilibus non intendat : à judicio temerario , ne in aliorum vitam inquirat à Pertinacia & singularitate , ut à communi sensu non recedat , neque sibi nimium fidat . Voluntatem moderatur Mortificatio , ut se voluntati divinæ & Superiorum promptè subjiciat , ad eorum nutum officia , & quasvis fun-

functiones suscipiat aut deserat, bonum commune suo privato præferat, & seipsum odio Spirituali prosequatur. Memoriam & Phantasiam etiam refrænat mortificatio, ut noxia & inutilia non recolant. Passiones cohibet, ut reæ rationis limites non transgrediantur, nec eam prævolent, sed illius ductum & imperium sequantur.

Porrò necessaria est Mortificatio animarum Pastori ex tripli Capite: *Primo* ad evitandum salutis propriæ discrimen in tot occasionibus peccatorum; propter quam causam S. Paulus quoque eam sibi adhibendam duxit *i. Cor. 9.* cum ait: *Casti-*

go corpus meum, & in servitutem redigo, ne forte cum alijs prædicaverim, ipse reprobus efficiar. Secundo ad partes officij sui ritè & exactè adimplendas: siquidem plurimæ in functionibus Parochialibus occurrunt difficultates & molestiæ, quæ sine Mortificatione & egregiâ sui victoriâ superari nequaquam possunt. Tertio ad declinanda scandalâ & offensiones. quæ ex nimia passionum libertate & indulgentiâ sequi consueverunt.



CA-

CAPUT V.

De Tentationibus.

Fili accedens ad sevitutem DEI
sta in justitia & timore, &
præpara animam tuam ad tentatio-
nem. Eccl. 2. Voluit Spiritus
S. his verbis significare, servum
DEI nunquam in hac vitâ
tutum fore à temptationibus.
Quod etiam declarat S. Hiero-
nymus exponens illud, Eccl. 3.
tempus belli & tempus pacis,
dum ait: *quarundam in præsenti
sæculo sumus, tempus est belli,*
*cum autem migraverimus de hoc
sæculo, pacis tempus adveniet: in
pace enim factus est locus DEI,* &

Ci-

Civitas nostra Jerusalem de pace
sortita vocabulum est: nemo ergo
se nunc putet securum in tem-
pore belli, ubi certandum est. Nec
refert, quod hostes nostri
aliquando oppugnare nos desi-
nant, id enim faciunt, ut nos
incautos & falsâ securitate de-
lusos fortius aggrediantur, &
imparatos expugnent. Descri-
bitur autem Tentatio, quod
sit impugnatio quædam, quâ
quis ad malum patrandum alli-
citur, & duplex est, *Externa*
una, quæ consistit solùm in Ex-
terna propositione rei vetitæ per
consilium, imperium, vel quam-
cunque factam exterius repræ-
sentationem, & talis fuit illa ten-
tatio Christi in deserto, *Matth.* 4.

Al-

Altera est *Interna*, quâ Phantasia nostra turbatur, & per species rei prohibitæ objectas percellitur, & pravis imaginationibus ludificatur, motusq; sensualitatis concitantur & talem temptationem Christus sentire non potuit, nos autem quotidie ferè sentimus & experimur, oriturque à causa vel externa, qualis est diabolus, qui propterea *adversarius noster* & *Sathanas sive Tentator* appellatur, & Mundus sive mali homines in Mundo, divitiæ, honores, illecebræ, & quidquid nos ad malum solicitare & à bono avertere solet. Vel oritur à causa interna, puta à concupiscencia nostra & appetitu sensitivo; unusquisque enim tentatur à concupi-

cupiscentia sua abstractus & ille-
citus. Jacob. 1. Vel à pravis nostris
habitibus, & peccandi con-
suctudine, quæ ad nova pec-
cata nos eò fortius trahit & in-
clinat, quò magis fuerit radi-
cata.

Media tentationes superandii
numerantur ab Asceticis Aucto-
ribus sequentia : Primum est
generositas animi & alacritas in
ipsa temptatione, juxta illud Ja-
cob. 4. *resistite diabolo, & fugiet*
à vobis. Habet siquidem se dæ-
mon in tentando quasi mulier
in rixando cum viro suo, quem
si advertat timidum & fugacem,
magis animatur, & ferociter vi-
rum invadit : si verò illum con-
stanti

stanti & erecto vultu resistere
conspiciat , illicò animum abji-
cit , & terga vertit. Ita prorsus
dæmon ex nostra timiditate eva-
dit animosior , & fortius instat ;
ex alacritate verò animi & gene-
rositate terretur & fugit. Suasit
hoc medium suis Discipulis B.
Antonius pugil in hac arenâ stre-
nuus , & multis trophæis à dœ-
mone relatis clarus , asseverans ,
inter reliqua arma contra sty-
gium hostem imprimis eminere,
quod quis in ipsa tentatione ge-
nerosum se , alacrem , & hila-
rem ostendat. Porrò excitat
hanc in nobis animi alacritatem
imprimis consideratio imbecil-
litatis Adversarij nostri, ut potè
qui non vincit nisi volentem ,

C sicut

sicut testatur S. Hieronymus
sup. Cap. 4. Matth. cum ait: per-
suadere potest, præcipitare non
potest, si ipsi nolimus. Et S. Au-
gustinus Serm. 197. de temp. Ve-
rum est, fratres, multum præva-
let, sed tepidis & negligentibus,
& DEU M in veritate non timen-
tibus, alligatus est enim tanquam
innexus canis catenis, & nemi-
nem potest mordere, nisi eum qui
se illi mortiferâ securitate conjun-
xerit, latrare potest, solicitare
potest, mordere omnino non potest,
nisi volentem.

Alterum medium superandi
tentationes est dissidentia sui
ipsius, & confidentia in solo
DEO: vult enim DEUS, ut
sem-

semper omnem gloriam, honorem & victoriam ipsi soli adscribamus, unde si homo in sua fortitudine & proprijs viribus confidat, meritò sibi & infirmitati suæ relinquitur, ne, quod soli D E O debetur, sibi præsumptuosè arroget. Atque hinc est, quod D E U S SS. in Literis auxilium & assistentiam suam promittat solùm in ipso confidentibus. Ut patet. *Psal. 90. Quoniam in me speravit, liberabo eum.* *Psal. 16. Qui salvos facis sperantes in te.* *Psalm. 17. Protector est omnium sperantium in se &c.*

Tertium Medium oritur ex secundo, & est Oratio sive petitio gratiæ & auxilij Divini : postquam enim homo suis viri-

C 2 bus

bus diffidit, ad DEUM tanquam auxiliatorem suum per Orationem confugere discit, fuitque hoc ordinarium Regio Psalti, ut passim invenire est in ejus Psalmis, & à Christo præscriptum Apostolis Matth. 26. illis verbis: *vigilate & orate, ut non intretis in temptationem*, & Matth. 6. *& ne nos inducas in temptationem.*

Quartum, Medium & impri-
mis efficax est, obstare statim
ipsis temptationum principijs,
antequam invalescant, & vires
acquirant, juxta illud S. Hiero-
nymi: dum parvus est hostis, in-
terfice, nequitia elidatur in semine,
Facilius quippe est scintillam
extin-

extinguere quām incendium,
& hostis cum minore periculo
rejicitur, dum adhuc extra por-
tam Civitatis subsistit , quām
cum per omnes illius plateas se
jam diffudit. Habent se tenta-
tiones ab initio instar morbo-
rum, qui Corpus humanum
tentare incipiunt, de quibus
Poëta : *Principijs obsta, serò me-
dicina paratur, cum mala per lon-
gas invaluere moras.*

CAPUT VI.

De Modestia.

Modestia vestra nota sit om-
nibus hominibus. Philip. 4.
Consistit hæc Virtus in mode-

ratione morum externorum , &
cultus corporis , sive in decora
incessus , vocis , risus , vestium ,
& quorumvis gestuum composi-
tione , qualem scilicet prescribit
Clericis Tridentinum , Sess. 22.
de reform. cap. 1. his verbis : *Sic
decet omnino Clericos in sortem
Domini vocatos vitam moresque
suos omnes componere , ut habitu ,
gestu , incessu , sermone , alijsque
omnibus rebus nil nisi grave , mo-
deratum , ac Religione plenum pre-
seferant , levia etiam delicta , que
in ipsis maxima essent , effugiant ,
ut eorum actiones cunctis affe-
rant venerationem . Necessaria
autem est Modestia imprimis
Parocho non solum propter aedi-
ficationem eorum , quibus pres-
est*

est , verūm etiam ad servandum
se ipsum immaculatum : Sunt
enim sensus externi ostia quæ-
dam , per quæ omne malum ad
cor ingreditur, si non sollicitè cu-
stodian tur , juxta illud, *Jerem. 9.*
Ascendit mors per fenestras. &
Thren. 3. Oculus meus depraedatus
est animam meam. Propter quod
etiam ex dissolutione morum &
sensuum externorum licentiâ
indicatur interior animi consti-
tutio propter naturalem , quām
externa cum internis habent cō-
nectionem , sicut testatur Scrip-
tura, *Eccl. 19. Ex visu cognoscitur*
vir , & ab occurso faciei cognosci-
tur sensatus : amictus corporis &
risus dentium , ingressus hominis
enuntiant de illo. Quia Specu-

lum mentis est facies , & taciti oculi tam modesti quam vagabundi
mentis fatentur arcana , ut inquit
S. Hieronymus ad Furiam vi-
duam : homo enim apostata , vir
inutilis , graditur ore perverso , an-
nuit oculis , terit pede , digito lo-
quitur . Prov . 6 . Confirmat id
S. Ambrosius lib . 1 . offic . cap . 18 .
duobus exemplis tragicis , dum
ait : est in ipso motu , gestu , incessu
tenenda verecundia , habitus enim
mentis in corporis Statu cernitur ,
Hinc homo cordis nostri abscondi-
tus aut levior , aut jactantior , aut
turbidior , aut contra gravior &
constantior & purior , & maturior
estimatur . Meministis , filij , quen-
dam amicum , cum sedulis se vide-
retur commendare officijs , hoc solo
tamen

tamen in Clerum à me non fuisse
receptum, quod gestus ejus pluri-
mum dedecret. Alterum quoque
cum in Clero reperisse, jussisse
me, ne unquam præiret mihi, quia
velut quodam insolentis incessū
verbere oculos feriret meos, Idque
dixi, cum redderetur post offen-
sam muneri, hoc solum excepī.
Nec sefellit sententia, uterq; enim
ab Ecclesia recessit. Ut qualis in-
cessu prodebatur, talis perfidiā
animi monstraretur, namq; alter
Arianae infestationis tempore fidem
deseruit, alter pecuniae studio, ne
judicium subiret Sacerdotem se no-
strum negavit. Lucebat in illorum
incessu imago levitatis species quæ-
dam scurrarum percurrentium.

C5

Atque

Atque hæc causa fuit , cur idem S. Doctor tres illos aureos libros de officijs ad reformandos in Clero suo mores conscripserit, tamque exactis regulis & præceptis illam externam vultus & totius corporis compositionem inculcaverit , ut de ipso testatur Baronius.

CAPUT VII.

De Castitate.

HÆc est voluntas DEI , sanctificatio vestra , ut abstineatis vos à fornicatione , ut sciat unusquisque vestrum vas suum possidere in sanctificatione & honore : non enim vocavit os DEUS in immunitatem , sed in sanctificationem.
i. Thessal.

1. *Theffal.* 4. Scribit Apostolus
hæc quidem ad omnes Ecclesiæ
Theffalonicensis fideles, maxi-
mè verò ad Sacerdotes & Pasto-
res, qui præcipua Ecclesiæ pars
sunt, & propriùs ad immaculata
mysteria accedunt, ideoq[ue] ad
majorem tum corporis tum ani-
mæ sanctitatem sunt obstricti.
Est autem Castitas *Virtus coërcens*
& domans venereas cupidita-
tes sive ut S. Augustinus descri-
bit. Virtus sub jugo rationis impe-
tum refrænans libidinis. Medium
illius conservandæ primum est
fuga occasionum illarum, in
quibus periclitari solet Castitas,
juxta illud Apostoli 1. Cor. 6. *Fugi-*
te fornicationem. Cum enim om-
nibus vitijs prædicaverit resisten-

C 6 dum,

dum, dum contra libidinem loqueretur, non dixit, resistite, sed fugite fornicationem, ut advertit S. Augustinus lib. de honest. mulier. cap. 1. Hujusmodi autem occasio est familiaritas & cohabitatio Parochi cum fœminâ maximè juvenculâ & extraneâ, cujus periculum indicat Sanctus Bernardus Serm. 34.. in Can. dicens: Cum fœmina semper esse, & non cognoscere fœminam, nonne plus est quam mortuos suscitare? quod minus est, non potes, & quod majus est, vis credam tibi? quotidie latus tuum ad latus juvenculae in mensâ, lectus tuus ad lectum ejus in Camera, oculi tui ad illius in colloquio, manus tuae ad manus ipsius in opere, & continens vis puta-

putari est ut sis , sed ego suspicio-
ne non careo. Similia his habet
S. Hieronymus in epist. ad Ne-
potian. Cyprianus lib. de singu-
lar. Cleric. Basilius constit. 4.
& alij.

Atque hæc etiam causa fuit ,
cur Sacra & Oecumenica Con-
cilia hanc Clericorum & mulie-
rum cohabitationem tam severè
interdixerint , ut videre est in
Nicæno , Lateranensi Magno
sub Innocentio III. & novissimè
in Trident. Sess. 25. de refor-
matione cap. 14. Quorum vestigijs
laudabilissimè insistens Celsissi-
mus ac Reverendissimus Noster
in suo Decreto nuper 21. Octob.
Anno 1679. edito districtè præ-
cepit ,

cepit, ut omnes ac singuli, qui per viros rem familiarem administrare potuerint, eorum opera dun- taxat utantur. At si talis Oecono- miae necessariò gerendæ status fue- rit, ut mulieres intra domum Cle- ricalem admittendæ sint, non quælibet absq; delectu, sed Matres aut Sorores si haberi possint, vel ejus- modi saltem personæ suscipiantur, quas sanctitudo morum & prove- ctior etas extra suspicionem Cri- minis tam fædi constituit, ea insu- per separatione factâ, quæ ipsos etiam Clericos ab omni periculo & occasione scandali liberet. Qualis autem hæc separatio esse possit, statim subdit his verbis: *id quod facillimè fiet, si præter ancillam puer alatur per quem, vel quo præ- sen-*

sente Clericus necessaria jubeat ,
quique individuus ejusdem , quoties
cum muliere tractandum erit , co-
mes & vitæ testis existat .

Secundum tuendæ Castitatis
medium est custodia sensuum ,
maximè autem visûs & tactûs .
Sunt enim sensus nostri via &
aditus , per quem species obsec-
næ ingredientes inæstimabilem
Castitatis thesaurum deprædan-
tur . Unde Job . Cap . 30 . Pepigi
fædus cum oculis meis , ut ne cogi-
tarem quidem de virgine . Et San-
ctus Basilius Homil . 24 . de Lib .
gent . testatur de Alexandro
Magno , quod Darij filias cap-
tivas admirabili formâ conspi-
cuas ne quidem videre dignatus
sit .

fit , ne illarum pulchritudine
à captivis captivaretur , non ig-
narus illius , quod canit Poëta :
*Si nescis , oculi sunt in amore du-
ces.*

Tertium est fuga crapulæ &
ebrietatis , juxta illud Apostoli
*Ephes. 5. Nolite ineberiari vino , in
quo est luxuria. Venter enim mero
estuans citò spumat in libidinem.*
teste S. Hieronymo Epist. ad
Oceanum. Sententia S. Nili
Abbatis est orat. 2. de luxuriâ.
*Qui ventrem cibis explet , & se
castè victorum profitetur , ei simi-
lis est , qui dicit , in Stipulâ se flam-
me impetum fræno cohibiturum :
quemadmodum enim furor ignis in
Stipulâ se viens coërceri non potest ,*
ita

*ita luxuria vis in corpore cibis di-
stento percurrentes retineri nequit.*

Et hæc quidem media consi-
stunt in fuga, quæ verò in agen-
do sita sunt, recensentur ab A-
scetis sequentia : *Primò*, Humi-
litas & animi demissio , quæ re-
movet superbiam , ad cuius ju-
stam punitionem D E U S sëpe
hominem in materiâ Castita-
tis tentari & superari permit-
tit. *Secundò*, Lectio & Medita-
tio SS. Scripturarum, & aliorum
Spiritualium librorum , teste
S. Hieronymo epist. ad Rusti-
cum : *Ana Studium Scriptura-
rum , & carnis vitia non amabis.*
Tertio, Labor & assidua occupa-
tio , juxta eundem Hierony-
mum :

mum: Facito aliquid operis, ut te
semper diabolus inveniat occupa-
tum. Quartò, Frequens Sacra-
mentorum, Pœnitentiæ & Eu-
charistiæ usus, maximè si Con-
fessio fiat coram eodem semper
Sacerdote.

CAPUT VIII.

De Obedientia.

Obedite Præpositis vestris, &
subjacete eis: ipsi enim per-
vigilant, quasi rationem pro ani-
mabus vestris reddituri, ut cum
gaudio hoc faciant, & non gemen-
tes, hoc enim non expedit vobis.
Hebr. 13. Tres causas affert hic

Apo-

Apostolus , propter quas subdi-
ti obedire debent superioribus
suis : Prima est , quia hi perva-
gant pro nobis , *quasi rationem*
reddituri pro animabus nostris.
Quæ certè ratiō maximum af-
ferre solatium deberet omni-
bus , sub obedientiā viventibus ,
eò quòd tuti & secuti sint , se in
omnibus rectè procedere , quæ
à superioribus injunguntur :
Quamvis enim superior errare
possit hoc illudvè jubendo , sub-
ditus tamen certus est se neuti-
quam errare illud exequendo ,
nisi manifestè malum appareat.
Unde S. Hieronymus in Regul.
Monast. cap. 6. Meritò exclam-
mat : *o summa libertas , quâ ob-*
tentâ vix possit homo peccare !

Qui

Qui enim perfectè obediunt ,
quasi in navi securè dormientes
ad portum Cœlestis Patriæ trans-
portantur , vigilantibus conti-
nuò & laborantibus pro ipsis su-
perioribus suis. Altera ratio
Apostoli est , ut *cum gaudio hoc*
faciant, non gementes : grave si-
quidem & permolestum est Su-
periori , quando subditus tam
parum mortificatus invenitur ,
ut de ipso pro libitu , & quod ex-
pedire judicaverit , statuere ne-
queat , sed anxiè semper ac timi-
dè secum disquirere necessè ha-
bet , an , quod imperaturus est ,
subditus æquâ mente sit accep-
taturus , quâ verborum formâ
proponendum ut consentiat ,
quæ motiva afferenda ut persua-
deat.

deat. Tertia ratio est, quod non expedit subditis resistere voluntati Superiorum, idque Primum, quia in re gravi mortaliter peccant, teste Apostolo Rom. 13. cum ait : *Omnis anima potest a-tibus sublimioribus subdita sit, non est enim potestas nisi à DEO : qua autem sunt à DEO, ordinata sunt.* Itaque qui resistit potestati, DEI ordinationi resistit : qui autem resistunt, ipsi sibi damnationem acquirunt. Ideò necessitate subditū estote, non solum propter iram, sed etiam propter conscientiam. Secundo, quia subditus non perfectè obediens in causa est, quod Superior tandem ei condescendat, & pro libitu suo agere sinat, quod sanè periculosisimum est,

&

& metuendum , nē id subdito
causa damnationis existat , dum
propriam voluntatem , quæ sola
in inferno ardet , nimium sequi-
tur , & superiorem in eam trahe-
re conatur. Unde S. Bernardus
Serm. de trib. ordin. Eccles. ad
Patres in capit. *Quisquis vel*
apertè vel occultè satagit , ut , quod
habet in voluntate , hoc ei spiritua-
lis Pater injungat , ipse se seducit.
Et tamen videmus hoc tempore
tam in Religiosis quam Eccle-
siasticis , id passim practicari ,
quod subditi ea officia & munia ,
quæ illorum voluntati & genio
minùs arrident , acceptare re-
nuant , & superiori quod sibi in-
jungi cupiunt , non obscurè in-
sinuent & quodammodo præ-
scri-

scribant , ita ut cùm ipsi ad exemplum S. Pauli seipsos indiferentes superiori offerre deberent, dicentes : Domine quid me vis facere ; Act. 9. Superior ex ipsis petere cogatur , quod Christus ex Cæxo : quid tibi vis faciam ? Luc. 18.

Porrò actus sive gradus Obedientiæ primus est , exequi promptè , fortiter & integrè rem à Superioribus præceptam . Quæ Obedientia operis dicitur . Secundus est propensio voluntatis sponte & libenter rem præceptam exequentis , & dicitur Obedientia voluntatis , distinguiturque à priori , quod in illa possit adhuc esse renisus aliquis & repugnantia

vo-

voluntatis, hæc autem insuper dicat facilitatem & propensionem ad operis executionem. Tertius gradus est Conformatio proprij Judicij cum judicio Superiorum, Judicando id optimum & expedientissimum, quod ipsi statuerint, diciturque *Obedientia intellectus*, de quâ S. Gregorius Mag. lib. 2. cap. 4. in 1. Reg. *Vera obedientia nec Praepositorum intentionem discutit, nec præcepta discernit: quia qui omne vitæ suæ judicium majori subdidit, in hoc solo gaudet, si, quod sibi præcipitur, operatur: nescit enim judicare, quisquis perfectè dicerit obedire.* Et S. Hieronymus Epist. 4. ad Rust. cap. 7. *Credas tibi salutare, quidquid*

Pra-

Præpositus præceperit : Nec de majorum sententia judices , cuius officium est obedire & implere, quæ jussa sunt , dicente Moysi : Audi Israël , & tace.

CAPUT IX.

De Temperantia.

Luxuriosa res vinum, & tumultuosa ebrietas ; quicunque his delectatur , non erit sapiens. Proverb. 20. Temperantiae nomine intelligo hic eam virtutem, quæ appetitum moderatur circa delectationem cibi & potûs , sive quatenus sub se comprehendit abstinentiam & sobrietatem : de Castitate enim, quæ species quo-

D

que

que est, vel pars integrans Temperantiae, jam supra diximus. Numerantur autem illius actus sequentes :

Primus studium cognoscendi quæ cibi ac potūs quantitas necessaria sit ad vitæ & valetudinis nostræ conservationem, nec non ad debitam munera à DEO nobis injunctorum administrationem. Secundus est non desiderare cibos singulares & delicatos, sed communibus & facile parabilibus contentum vivere, juxta exemplum Sanctorum, quibus DEUS in Scriptura legitur parasse mensam plerumque vulgarem & communem. Tertius est nunquam cibum sumere

mere vel potum , nisi tempore
& loco consueto. Quartus , ca-
vere à nimia aviditate & festina-
tione in ipsa sumptuione cibi vel
potūs , juxta monitum sapientis
Eccli. 37. Noli avidus esse in omni
epulatione , & non te effundas su-
per omnem escam : in multis enim
escis erit infirmitas , & aviditas
appropinquabit usq; ad choleram.
Quintus est , nunquam de cibis
vel potu miscere sermones , nec
de ijsdem conqueri aut murmu-
rare , quod minùs lautè præparati
fuerint , juxta exemplum S. Ca-
roli Borromæi , qui nunquam
loqui vel querelari auditus est
de cibis , quod fortè appositi es-
sent , quos nollet , aut non allati
quos vellet. Sextus Temperan-
tiæ

tiæ actus est vitare occasions , in quibus contra illius regulas peccari solet ; quales imprimis sunt **comessationes & convivia tam domi quam foris celebrari solita.** Et quidem quod Parochus domi suæ mensam frugalem collere , & convivia intermittere debeat , hortatur Hieronymus Epist. ad Nepotianum Clericum , cum ait : *Mensulam tuam pauperes & peregrini , & cum illis Christus conviva noverit . Turpe est ante fores Sacerdotis Christi Crucifixi & pauperis , & qui cibo quoque vescebatur alieno , lectores Consulum & milites excubare , judicemq; provinciae melius apud te prandere quam in palatio . Et alibi : Si in Apostolorum loco sumus , non solum ser-*

sermonem eorum imitemur , sed conversationem quoque & abstinentiam amplectamur : non oportet , inquiunt , dimisso verbo DEI ministrare nos mensis . Totâ Clerici urbe discursant , querunt exhibere judicibus , quæ illi in prætorijs suis aut invenire non possunt , aut certè inventa non coëmunt .

Quoad convivia verò in alienis ædibus monet idem Hieronymus Epist. cit. ad Nepotianum his verbis : *Convivia tibi vitanda sunt secularium , & maximè eorum , qui honoribus tument . Consolatores potius nos in mæroribus suis , quam convivas in prosperis noverint . Facile contemnitur Clericus , qui sæpè vocatus*

ad prandium non recusat. Nunquam petentes, raro accipiamus rogati: nescio enim quo modo etiam ipse, qui deprecatur, ut tribuat, cum acceperis, viliorem te judicat, & mirum in modum, si cum rogantem contempseris, plus te posteriorius veneratur. Imprimis autem vitanda sunt Parocho convivia Baptismalia & Nuptialia, sicut ea Clericis expressè prohibuit Concilium Agathense cap. 39. Et alia postmodum diæcesana Concilia sunt subsecuta; Imò & Celsitudo Sua prioribus, scilicet Convivijs baptismalibus per utramque Diæcesin suam ipsis quoque laicis penitus interdixit, posteriorum verò luxum laudabiliter restrinxit. Nec excusat exemplum

plum Christi accendentis. Nuptias in Cana Galilææ, sicut benè notat Petrus Abelardus Serm. de Epiphan. cum ait: *Si quis igitur Clericorum tantæ opportunitatis occasionem se habere confidit, accedit intrepidus, gerat quæ Christus, & ei indulgemus.* Cum autem vita hominis tentatio sit, & inter nuptiales epulas maximè sobrietas perreat, honestas periclitetur, luxuria convalescat, tanto hæc convivia amplius vitanda sunt, quanto eos in virtutibus præeminere decet.

* *

D 4

CA-



CAPUT X.

De Liberalitate.

Est autem quæstus magnus; Pietas cum sufficientia, habentes autem alimenta, & quibus tegamur, his contentissimus. 1. Timoth. 6. Definitur Liberalitas: Virtus quæ moderatur affectum & appetitum ad bona tempora- lia, sive per quam deposito in- ordinato bonorum tempora- lium studio, ea alacriter in propriam & proximi utilitatem, atque ad DEI cultum secundùm rectam rationem impendimus. Opponitur ei per defectum Ava- ritia,

ritia , quâ homo suprà debitum modum cupit acquirere vel retinere bona hujus mundi , estque vitium summoperè dedecens Parochum , & plurimorum in eo malorum caput atque origo : *Primò* Enim Spiritum devotionis extinguit , quotidiana illius exercitia insipida reddit , mentem continuis curarum & solitudinum stimulis exagitat , illamque in officij divini recitatione & Missæ Sacrificio in varias & inutiles cogitationes distrahit , concepta meditationis matutinæ proposita suffocat , quin imò nec tempus quidem & otium ad meditandum permittit ; unde etiam jure merito à Christo spinis bonum semen-

tem Patrisfamilias suffocantibus
comparatur, *Matth. 13.* Secundo,
Parochum ad se^ttandum tur-
pem quæstum, mercaturam, &
ignominiosam statui Clericali
negotiationem impellit, quam
velut scandalosam, multisque
perjurij, fraudis ac injustitiæ pe-
riculis expositam ALEXANDER III.
sub interminatione
anathematis omnibus Clericis
interdixit *cap. Secundum; 6. tit.*
ne Clerici.

Tertio, Parochus, cuius ani-
mum inexplebilis pecuniæ sitis
jam occupavit, in ipsis quoquè
sacris Ecclesiæ functionibus lu-
cro inhiare, & quæ Christus
Sacramenta tanquam salutis no-
stræ


stræ media instituit , ille ad finem prophanum & opes cumulandas ordinare non erubescit : Undè etiam ulteriùs accidit , ut pauperibus in sua Parochia & miseris , à quibus nullam retributionem sperare potest , in administratione SS. Sacramento rum tam facilem ac promptum se non exhibeat . Quartò , Avaritia Parochum reddit immisericordem & durum ergà personas miseras & affictas , quarum tamē curam illi specialiter commissam esse docet , Tridentinum Sess. 23. de reformat. cap. 1. cum ait , Præcepto divino mandatum esse omnibus , quibus animarum cura commissa est , pauperum aliarumque miserabilium personarum

curam paternam gerere. Et indicat S. Paulus ad Galatas 2. dicens, cæteros Apostolos post datas invicem Societatis dextras à se & Barnaba petijisse, *tantum ut pauperum memores essent.*

A Iterum vitium, quod Liberalitati per excessum opponitur est Prodigalitas, quæ in largiendo exceditur, & contingit vel dando, quibus non oportebat, vel ex causis, quibus non debebat; vel excedendo modum inquantitate dati; vel denique nimios sumptus expendendo in proprios usus. Prohibet eam non solum Episcopis, verum etiam quibuscunque beneficia Ecclesiastica obtinentibus Tridentinum

num Sess. 25. de refor. cap. 1. jubens, ut modestâ supellectili & mensâ ac frugali viâ contenti sint: nequè ex redditibus Ecclesiæ Consanguineos, familiaresvè suos augere studeant, sed si pauperes sint, ijs ut pauperibus distribuant; eò quod res DEI sint. Idem statuit Celsissimus ac Reverendissimus Noster in decreto suo supra memorato de Parochis Diœcesis Herbipolensis, ubi insuper Definitoribus, Decanis, & Consiliarijs Ecclesiasticis, maximè autem Fiscali serìo injungit, ut eos, qui ludendo, bibendo, circumvagando, vel aliter nec finem, nec modum dissipationum fecerint, fideliter denuntient, quò sic maturè intrà honestatis terminos con-

contineri , aut si ita visum fuerit
Domui Demeritorum usque ad
correptionem ac emendationem
condignam immancipari pos-
sint. Et meritò quidem , peccat
enim Parochus prodigus non
solùm in seipsum , sed etiam in
Ecclesiam & pauperes , quibus
ex superfluis redditibus sive ex
Justitia , sive ex Religione pro-
videre debet , ut testatur S. Tho-
mas q. 119. Art. 3. ad 1. cum ait
Clericos esse Dispensatores bono-
rum Ecclesie , quae sunt pauperum ,
quos defraudant prodigè ex-
pendendo.



CA-

CAPUT XI.

De Fuga Otij.

Multam malitiam docuit otiositas. Eccl. 33. Effectus Otij est casus Regis Davidis 1. Reg. 11. Iniquitas Pentapolitatum Ezechiel. 16. Et seductio vecordis illius juvenis Proverbior. 7. Videlicet sicut aqua stagnans & immota progenerat serpentes, bufones, aliaque animalia immunda ; sicut ager incultus profert spinas & tribulos ; sicut aer immotus pestilens existit & venenosus : ita homo qui serijs rebus corpus & animam non exercet,

ercet , pessimos scelerum & ini-
quitatum fructus producit , ma-
ximè si in delitijs vivat , & san-
guis in corpore juvenili adhuc
ferveat , His verò tam perniciosis
otij & desidiæ effectibus facilli-
mè obviabit Parochus , si omnes
totius diei horas eâ ratione &
modo distribuat , certamque cui-
libet horæ functionem suam ita
assignet , ut semper cum diabo-
lus occupatum inveniat . Ut enim
otiosus deficit ab ordine suo , sic qui
ordinem sibi constituit , otiosus
esse desinit , juvta Theophila-
tum in 2. Thessal. 3.


Præscribit hanc temporis di-
stributionem Celsissimus ac Re-
verendissimus Noster in suo De-
creto

creto suprà citato his verbis :
Functiones suas per integrum diem ita distribuent, ut nec otio, nec commissationibus, vel alijs indignis occupationibus locum dent; vultque Visitatores suos in eam distributionem studiosè inquirere, ut ibidem subdit. Loquitur de hoc ordine temporis etiam B. Laurentius Justinianus *Lib. de discip. & perfect. monast. convers. cap. 10.* dicens : *Maximi procul dubio periculi res est, pro ut suggerit animus, velle degere. Propterea cunctis consulendum est, ut taliter unumquodque disponant opus, quatenus quaelibet hora propriam habeat actionem. Sciant, quando orationi, quando lectioni, quando operi manum incumbendum*


dum sit ; ne acedia spiritu in mentis dubietatem vel hebetudinem evecti tempus suum inaniter consumant. Porro ab hac regula , quam sibi ipsi Parochus in observatione temporis præscripsit, recedere nunquam debet , aut in ullo casu dispensare , *Nisi fraternali charitate , vel necessitate aliqua , vel obedientia majoris retardetur , ne paulatim viam ad laxitatem sternat , ut benè monet S. Bonaventura myst.*

Theol. Cap.

3. p. 3.

......

CA-



CAPUT XII.

De Fuga Familiaritatis Laicorum.

Nolite transfire de domo in domum. *Luc. 10.* Noluit Christus Discipulos suos & Prædictores per domos circumcursare, sine necessitate cum Laicis conversari, aut illis familiares se reddere, sed à populo, segregatos, & quantum officij ratio permittit, à sacerdotali consortio abstrahitos vivere: *Primo*, quia per hanc segregationem multa declinant peccatorum pericula. *Secundo*, quia sic aptiores redundunt.

duntur ad orandum & contemplandum , propter quod & ipsum Christum s̄epe legimus in loca ab hominibus separata abivisse , quando Patrem suum cælestem orare volebat. *Tertio* , quia per ejusmodi segregacionem conservant sibi tempus quod per crebras cum Laicis conversationes s̄epe inutiliter consumitur. *Quartò* , quia hac ratione sibi auctoritatem conciliant & venerationem : sicut enim familiaritas contemptum parit , ita solitudo reverentiam & authoritatem. **Unde S. Gregorius :** *Egressus Samuelis expectetur ; quia viri sancti in secreto silentij sui venerandi sunt : Raro videbatur in civitate , tardè veniens,*

niens, citò recedens: Quo magisterio S. Ecclesiae Doctor instruitur, ut raro sit in publico, frequens in occulto; ut quo tardius aspicitur, diutius veneretur. Atque his de causis Celsissimus ac reverendissimus Noster in suo Decreto jam supra memorato statuit, ut sui Clerici Sæcularium familiaritatem quandoque nocivam devitent, & ne Alumni in Seminario vel extra illud ipsum in urbe cum sæcularibus cœnent aut prandeant, vel aliter (nisi quantum summa necessitas ac Superiores voluerint) conversentur. Et quidem si Parochus eo, quo supra diximus, modo tempus suum ita distribuat, ut cuilibet horæ certa sua respondeat functio, nullum ei tempus con-

conversandi inutiliter cum Lai-
cis supererit, & functionum pul-
chro sibi ordine succendentium
alternatio omne temporis & la-
boris fastidium ita tollet, ut non
solum occasionem conversatio-
nis non sit expetitus, verum
etiam si haec adfuerit, ægrè & in-
vito animo illâ sit usurus, media-
qùe ab importuno se hospite li-
berandi indagaturus. Quale me-
dium suggerit S. Franciscus Xa-
verius, cùm monet, ut quis cum
tali, per quem se in solitis suis ex-
ercitijs prævidet impediendum,
sermonem de rebus divinis & sa-
lutem concernentibus instituat:
quo si alter delectetur, habet jam
aliquem laboris & conversatio-
nis suæ fructum: si verò alter in-

vi-

vitus de ejusmodi spiritualibus sermonem audiat, haud diu auseculabit, sed brevi discedet, relinquens ei tempus pro suis functionibus ordinarijs constitutum, nec tam facile revertetur.

CAPUT XIII.

De Meditatione.

Nisi quod lex tua meditatio mea est, tunc forte perijsem in humilitate mea, Psal. 118. Significat his verbis Psalmista necessitatem Meditationis sive Orationis Mentalis: quæ necessitas quamvis in omnibus DEO servire volentibus, imprimis tamen in animarum Pastore reperitur

perit ut esse maxima , idque pri-
mò quia hic destituitur illo mu-
tuæ societatis bono , quo alijs in
Collegijs & Monasterijs con-
vientes perfruuntur , dum per
pia colloquia & spirituales con-
ferentias se mutuo excitare , &
fervorem Spiritus sui conserva-
re possunt. Secundo quia Paro-
chus in quotidianis ferè pericu-
lis versatur , & sic etiam quoti-
die sibi per Meditationem vel
sacram lectionem de remedijis
prospicere necesse habet.

Tertio quia frigidæ admodum
& quasi emortuæ ejus ad popu-
lum Conciones existent , nisi
meditatio illis animam addat &
Spiritum. Quartò quia diver-
sa

sæ & necessariæ sæpè rei familia-
ris distractiones paulatim tempo-
rem inducent, eumque in Spi-
ritu languescere facient, nisi
flabro Meditationis & recolle-
ctionis quotidie reaccendatur &
foveatur: Sicut enim carbones
vivi paulatim splendorem ignis
& calorem amittunt, quando à
flamma separati sub liberâ aurâ
collocantur, nisi continuò venti-
labro conserventur, ita quoque
Parochus licet in Seminario pie-
tatis ardore accensus fuerit &
flagraverit, si tamen à Conferen-
tijs Spiritualibus remotus, & in
liberiorem auram dimissus fue-
rit, paulatim à fervore Spiritus
remitte, amissoque igneo chari-
tatis colore nigredinem peccato-

E rum

rum contrahet, nisi quotidianâ Meditatione quasi flabro quodâ se assiduè excitare & Spiritum suum renovare laboret. Perspexit probè hanc necessitatem Celsissimus ac Reverendissimus Noster, quando in suo Decreto jam sæpius memorato Consiliarijs, Decanis, ac quibuslibet Visitatoriis suis Diœcesis injunxit, ut Parochi in visitationibus ac Capitulis ruralibus diligenter examinentur, maximè de functionibus ad se spectantibus, quotidianis Meditacionibus, Lectionibus spiritualibus &c.

Definitur autem Meditatio, quod sit attenta rerum divinarum consideratio, ad excitandos affectus pios erga DEUM, & con-

concipienda proposita vitæ Spirituali accommodata. Tres illius sunt partes : prima continet præparationem , & duplex est : una *Remota* , quæ fit pridie selingendo materiam certam , solidam & ex principijs fidei nostræ depromptam, eamque in duo vel tria puncta dividendo , & certum quendam finem sive scopum , qui in meditatione spe-ctandus est , præfigendo. Altera præparatio est *Propinqua* , & consistit partim in oratione sive petitione gratiæ DEI , partim in præludijs , quæ sunt recognitio præsentiaæ Divinæ , & finis particularis per preces commendatio.

Secunda pars Meditationis continet officium & exercitium intellectus & voluntatis : Intellectus quidem , ut is primò circa materiam Meditationis actum fidei eliciat , qui fundamentum sit & solida basis actuum voluntatis exinde consecutrorum. Secundo ut ipsam Meditationis materiam non simplici tantum actu fidei secundum nudam substantiam percipiat, verum etiam circumstantias & qualitates ad voluntatem movendam idoneas penetret. Tertio ut ex prævijs fidei actibus deducat conclusiones practicas, quibus determinet quid amandum , timendum , desiderandum , fugiendum &c.


Ex-

Exercitium voluntatis est primo , ut ex proposita fidei veritate eliciat pios affectus , sive diversarum virtutum actus , & colloquia cum Christo , B. Virgine , Angelo Custode &c. Secundo , ut efformet proposita conclusionibus per intellectum ex fide deducatis consentanea , statuens qualiter per decursum illius diei juxta dictamen ab intellectu propositum vivere velit , quibus medijs ad superandam passionem , vel virtutem acquirendam uti. Quæ quidem proposita voluntatis esse debent non generalia & abstracta , sed particularizata , & de Vitio in tali occasione , loco , tempore &c. fugiendo ; Eò quod proposita solum generalia

ordinariè suo effectu careant,
& animum non satis fortiter
contra tentationes præmuniunt.

Tertia pars Meditationis est *Conclusio*, & consistit in tribus. Primum est, ut DEO agantur gratiæ pro luminibus per decursum Meditationis communica-
tis. Secundum, ut petatur gra-
tia ad proposita fideliter exe-
quenda. Tertium, ut hæc ipsa
proposita & affectus contrahan-
tur in brevem aliquam & ner-
vosam sententiam pro juvanda
memoria, & fervore ex Medita-
tione concepto imposterūm con-
servando : quæ sententia à S. Sa-
lesio *fasciculus devotionis*, ab alijs
verò *Tessera* nominari solet.

CA-



CAPUT XIV.

De Examine Conscien- tiae.

Quae dicitis in cordibus vestris, in cubiculis vestris compungimini. Psal. 4. Describitur Examen conscientiae, quod sit vitæ actionumq; nostrarum recognitio, estimatio, & expensio ad finem vocationis nostræ directa ad eas corrigendas. Utilitas ejus multiplex est. Primo enim errores admissores per contritionem retractat, hominemque D E O reconciliat. Secundo per novum propositum mentem con-

fortat in futurum. *Tertio* hominem dicit in veram & genuinam sui ipsius cognitionem. *Quarto* prudentiam parit in Spiritualibus & experientiam: *Consilium enim futuri venit ex prærito*, ut ait Seneca.

Dividitur autem Examē Scientiæ in *Generale*, quod pro materiâ habet omnes actiones, errores & defectus ab ultimo tempore facti examinis admissos: & in *Particulare*, quod vi-
tium aliquod in particulari extirpandum respicit. Prius constat in Quatuor potissimum pun-
ctis: Primum, est petitio gratiæ ac luminis à DEO ad reperien-
dos defectus & peccata, in quæ pro-

prolapsi sumus. *Secundum*, est exactio rationis de cogitationibus, verbis & operibus, ab ultimo examine admissis. *Tertium*, est dolor de peccatis, si quæ deprehensa sint ; vel gratiarum actio, si ab illis fuerimus præservati. *Quartum* denique Punctum est Propositum emendationis de futuro & conclusio totius examinis per brevem aliquam orationem. Generali examini teste Alphonso Rodericio p. 1. tract. 7. c. 10. n. 3. subjungitur *Particulare*, cuius hæc est praxis : Primò in eligenda materia aliquius vitij extirpandi habenda est ratio gravitatis & universalitatis, ut semper ante omnia laboremus eradicare illud, quod

E 5 cæ-

cæteris graviùs, & aliorum vitiorum fons atque Caput esse solet. Secundo necesse est in unoquoque vitio distingui gradus, ut non uno voluntatis nisu sive conatu totum vitium in suâ generalitate oppugnemus, sed ab uno actu ad alterum gradatim procedamus. Tertio numerus quotidianorum lapsuum scripto annotari debet, & tempus matutinum cum pomeridiano, dies cum die, mensis cum mense conferri, ut quantum profecerimus, faciliùs dignosci queat. Quarto non facilè mutanda est particularis Examinis materia, sed tamdiu uni vitio oppugnando insistendum, quoad usq; planè devictum fuerit & superatum. Quinto

tò posteaquam lapsos nos esse deprehendimus , statim elicto dolore error est corrigendus , & propositum renovandum. Sextò denique post lapsum semper pœna aliqua à nobis exigenda est , & castigatio voluntaria infligenda. Porrò Tempus Conscientiam examinandi opportunum juxta Alphon. Rodericum p. 1. tr. 7. c. 10. n. 2. & 3. M. Avilam in audi filia ; c. 62. Ludovicum de Ponte in suo Duce Spirituali tr. 2. c. 7. §. 5. &c. est Matutinum , Meridianum , & Vespertinum , unde S. Dorothaeus Ser. 11. Quo pacto per singulos dies nos ipsos purgare , & propemodum expiare debeamus , exactè docuerunt Majores & Patres nostri , nempe ut

ut Vesperi sedulò quisq; perquirat & investiget, quomodo pertransierit diem illum: rursus manè examinet, quomodo exegerit noctem illam, & pænitentiam agat, & resipiscat coram DEO, si quo pacto (ut fieri potest) peccatum aliquod admiserit.

CAPUT XV.

De Exercitijs Spiritualibus.

Venite seorsim in desertum locum, & requiescite pusillum
Marc. 6. Nomine Exercitorum
Spiritualium intelligitur hic re-
collectio sui ipsius per meditatio-
nes, Spirituales lectiones, ora-
tiones

tiones , examina Conscientiæ , & alias functiones Spirituales per aliquot dies certo ordine & methodo sub directione Patris Spiritualis instituta. Finis dictorum Exercitiorum est , mentem recolligere , sive statum suum interiorem perspicere & ordinare , quid imposterum fieri oporteat ad eum , si sanus & rectus inveniatur , conservandum , aut si distortus & pravus , reformatum. Unde patet summum illorum esse fructum & utilitatem : *Primo* enim faciunt hominem devenire in statu sui interioris , vitiorum & defectuum exactam notitiam , quos defectus fortassis hucusque proprio amore excæcatus nunquam agnovit saltem esse

esse tam graves & indecentes. **S**e-
cundò omnia præterita peccata
per Confessionē Generalem ex-
piantur , ac si qui fortè in præce-
dentibus confessionibus errores
admissi fuissent , corriguntur.
Tertiò peccatorum radices &
causa investigantur , mediāque
deinceps illa declinandi excogi-
tantur. **Quartò** novi stimuli &
calcaria homini adduntur ad re-
liquum vitæ suæ stadium ala-
crius decurrentum, caviturque
ne conceptus in prima status
Clericalis susceptione fervor
languere progressu temporis in-
cipiat. Quæ etiam ratio fuit, cur
Celsissimus & **Reverendissimus**
Noster in Decreto suo jam sæpius
nominato tam serio & sub inter-
mina-

minatione Divini judicij suo in
Spiritualibus Vicario Generali,
& Consiliarijs Ecclesiasticis in-
junxerit, omnes ac singulos ani-
marum curæ præstitutos annua-
tim ad dicta Exercitia convo-
care.

Praxis autem & methodus
hæc Spiritualia Exercitia cum
fructu obeundi ab Asceticis Do-
ctoribus præscribitur ista: *Primò*
Seponenda sunt omnia alia ne-
gotia, & animus à Curarum tem-
poralim strepitu subducendus,
ut DEUM intus loquentem Af-
ceta audire possit. *Secundo* com-
mendandus est hic exercitiorum
secessus DEO & Sanctis per pre-
ces, lumenque petendum ad mi-
ferias

serias , & indigentias spirituales agnoscendas. Pro quo fine eligi poterit præter B. V. MARIAM unus alterve Patronus , v. g. S. Josephus, Angelus Custos &c. *Tertiò* excipiendæ sunt instru-
tiones & monita Patris sive Ducis Spiritualis , qui ascetæ in
hac solitudine adjunctus fuerit ,
ut ipsum in distributione tem-
poris, determinatione materiæ,
meditatione & sacra lectione
dirigat , in dubijs & difficultati-
bus Conscientiæ suæ enodandis
auxilium præbeat , consilia &
media opportuna ad curandos
animi morbos , & progressum in
vita spirituali faciendum sugge-
rat. *Quartò* añotanda sunt lumi-
na potiora , quæ in meditatio-
nibus

bus & reliquis Exercitiorum functionibus à DEO superno lumine in anima accenduntur , sicut & concepta vitæ in melius mutandæ proposita, ut deinceps fæpius relegi , & in memoriam revocari possint. *Quintò* instituenda est Confessio Generalis omnium peccatorum , saltem ab ultima Generali Confessione admissorum , si tamen ea Patri spirituali visa fuerit expediens , & non magis eam propter Conscientiæ anxietates & scrupulos omittendam judicaverit. *Sextò* denique postquam Exercitia finem suum habuerint , referendæ sunt DEO Opt. gratiæ pro luminibus & omnibus donis iu decursu Exercitiorum

rum concessis , rogandusque est ,
ut , qui velle dedit , perficere
etiam tribuat .

CAPUT XVI.

De Celebratione quotidiana & Confessione Sacramentali.

Qui manducat me , & ipse vivet propter me . *Joan. 6.*
Quantum subsidij Parocho conferat ad se conservandum in
Statu gratiae quotidiana & digna
celebratio , sive oblatio Sacrificij
incruenti , patet indè , quod
inter celebrandum sumat Domini
Corporis & Sanguinis Sacra-
mentum , cuius effectus Specia-
lis

Iis est, nutritre & confortare animam adversus tentationes , & à peccatis præservare : Sicut clare indicat Tridentinum. *Sess. 13.*
Cap. 2. Cum ait : *Sumi autem voluit Sacramentum hoc , tanquam spiritualem animarum cibum , quo alantur , & confortentur viventes vitâ illius qui dixit :*
Qui manducat me , & ipse vivet propter me : & tanquam antidotum , quo liberemur à culpis quotidianis , & à peccatis mortalibus præservemur. Dixi : *Dignam Celebrationem :* Ut verò Parochus dignè quotidiè celebret , duo imprimis observanda sunt ; Primum est , ut vita ipsius sit continua quædam ad Sacram Communionem præparatio , id est ,
ut

ut manè à somno usquè ad tempus Sacrificij à quibusvis peccatis, etiam venialibus, abstinere satagat, cā videlicet de causâ, quia illo die est communicatus; post celebrationem verò usq; ad finem diei, sive usquè ad somnum se immaculatum conservet, ideo, quia illo die communicavit: Nequè enim Parochus minorem animi præparationem ad hanc Sacram mensam afferre debet quàm Laici, qui diebus illis, quibus communicant, singulari studio à peccatis sibi cavent, & operibus pietatis se dedunt. Alterum est, ut Parochus per Confessionem Sacramentalem frequenter Conscientiam suam emundet juxta illud

illud *Apostoli 1. Corinth. 11. Probet*
autem se ipsum homo, & sic de pa-
ne illo edat, & de calice bibat.
Non enim sinit frequens Con-
fessio sordes peccatorum etiam
venialium in conscientiâ cumu-
lari, sed sicut scopæ itetatae con-
servant munditatem domûs, ita
& hæc munditatem & puritatem
mentis. Laudabilis est multo-
rum Parochorum consuetudo,
ut singulis saltem octo diebus se-
mel ad minimum Confessio-
nem suorum peccatorum insti-
tuant, nisi necessitas aliquando
pluriès intra hebdomadem exi-
gat. Ordinârunt Patres Tri-
dentini *Sess. 23. de reform. c. 18.*
de pueris in Seminario educan-
dis, ut hi saltem singulis mensi-
bus

bus confiteantur peccata. Adul-
tiores verò & aliquo jam Ordine
Sacro initiatos monent in ea-
dem Sessio. c. 13. ut sciant, maxi-
mè decere, si saltē diebus Domi-
nici & solemnibus, cum altari
ministraverint, sacram Commu-
nionem perceperint, præmissâ sci-
licet, Sacramentali Confessione,
& Celsissimus ac Reverendissi-
mus Noster in suo Decreto supra
memorato statuit, Neminem ad
ullum sive Majorem sive Minorem
Ordinem, imò nec ad Tonsuram
quidem admittendum esse, qui non
menstruatim bis ad minimum ad
Sacramentalem Confessionem & sa-
cram Communionem accesserit.
Quid ergò Hi minus à Sacerdote
& Parocho exigere poterunt,
quam

quām ut singulis saltem octo diebus sacram pœnitentiæ Tribunal frequentet pro acquirendâ & conservandâ illâ , quam sacra Mysteria requirunt , animi puritate & sanctitate . Nec dicas : quid semper pro absolutione afferam ? deficit me materia : *Sep-
ties enim in die cadet justus. Pro-
ver. 24.* Et , si vestis , quæ intra cubiculum asservatur , pulvere sàpè conspergitur , ac purgatione opus habet , quantò magis illa quæ foris in platea & compitis circumfertur ? Volo dicere : Si religiosus in claustro suo existens invenit post octiduum in suâ conscientiâ , quod per Confessionem purget , quantò magis Parochus in munda-

nâ

nâ conversatione constitutus ? quod si aliam pro absolutione materiam non inveniat , hæc certè sufficiens erit , quod in quotidianis suis actionibus adeò negligens & incurius fuerit , ut defectus & errores in illis admis-
tos non observârit . Quod si ve-
rò (sicut fieri potest) lethali
peccato se inquinâset Parochus ,
servanda esset illa præceptio
Tridentini Sess. 13. c. 7. statuen-
tis , ut nullus sibi conscientia mortalis
peccati , quantumvis sibi contritus
videatur , absq; præmissâ Sacra-
mentali Confessione ad Sacram
Eucharistiam accedere debeat . Mo-
do non desit copia Confessoris .
Quod si necessitate urgente Sacer-
dos absq; præviâ Confessione cele-
brave-

braverit, quamprimum confiteatur. Confessarium quod attinet, solent aliqui Parochi confiteri suis Capellanis, & Capellani vicissim suis parochis; quod ego non probo, saltem extra necessitatem propter mala, quæ exinde accidere possunt & solent partim contrà Reverentiam Sacramenti, partim etiam contrà spiritualem Pœnitentium utilitatem. Confessarius igitur eligatur talis, qui sit vir matus & gravis, doctus, discretus, & non nimium familiaris, quique pœnitentem carpere vel monere non erubescat, si ita ad emendationem illius necesse fuerit.